

Skripja Tieta

I kam long Rebekah Jakeman
(I kamaot long wan tru stori)

Stori ia i hapen long YSA.

"**M**i les blong stap nating." Jonny i stap silip long floa blong siting rum.

Sista blong hem Jenna i stap lukluk aotsaed long windo. "I nogat samting blong mekem," hem i talem.

Jonny i lukluk antap long siling. "From wanem i filim olsem se ol Sandei oli no naes tumas?"

Afta, hem i tingbaot wan samting. "Olsem wanem sapos yumi openem Sandei bokis?" Jonny i askem. Sandei bokis hem i wan spesel bokis we i fulap long ol gem blong pleiplei long hem long Sandei.

Fes blong Jenna i hapi wetem wan smael. "Hemia i naes blong mekem!"

Jonny mo Jenna i spid i go long rum blong Mama. Tufala i pulumaot wan bigfala bokis i go long siting rum.

"Bae yumi mekem wanem faswan?" Jonny i askem. Hem i openem bokis mo karemaot sam pikja buk mo wan gem blong kad.

"Olsem wanem sapos yumi openem Sandei bokis?" Jonny i askem.



"Yumi plei gem blong faenem ol pikja blong ol skripja hiro we oli semsemmak," Jenna i talem.

Gem ia i gat ol kad we oli gat ol pikja blong ol profet blong Buk blong Momon. Jenna i putum ol kad daon mo i fesem floa. Tufala i plei wan afta narawan blong stap pikimap ol kad mo traem blong faenem ol pikja we oli semsemmak.

Jonny i pikimap tu defren kad we Kaptan Moronae i stap long hem. "Mi faenem semsemmak wan!" hem i singaot.

"Mi tu!" Jenna i soem tu kad we i gat pikja blong Saraea long hem.

Jonny mo Jenna i plei sam moa raon. Hem i wan gud taem blong tingbaot ol fevret stori blong olgeta long Buk blong Momon.

Afta long sam taem, Jenna i talem, "Yumitu mekem wan nara samting."

"Okei. Yumitu aktem wan long ol fevret skripja stori blong yumi. Bae yumitu gat wan skripja tieta!" Jonny i stat blong pikimap ol kad.

"Yes!" Jenna i help blong pikimap gem blong tufala mo putumbak.

Jonny i lukaot ol samting insaed long bokis kasem taem hem i faenem sam klos blong aktem stori. Hem i karemaot wan braon kaliko dres mo i werem. "Mi mi Samuel, wan Man blong Leman!" Hem i jiam i go antap long wan jea mo aktem Samuel we i stap tij antap long wol blong siti.

Jenna i openem pikja buk blong Buk blong Momon. Hem

i lukluk tru long ol pej kasem taem hem i kasem stori blong Samuel, wan Man blong Leman. Hem i ridim stori laod mo Jonny i aktemaot stori.

Tufala pikinini i praktisim stori sam moa taem. Jonny i filim wom mo hapi insaed long hem. I filim gud blong tingbaot ol profet we oli bin tijim abaot Jisas Kraes.

Taem tufala i filim se tufala i redi, Jonny i ron go long Mama, Papa, mo smol sista blong olgeta, Makenna. "Kam mo luk pleiplei blong mitufala!"

Jenna i stanap long medel blong rum mo i openem ol han blong hem. "Welkam long skripja tieta blong mifala. Tedei bae mitufala i presentem stori blong Samuel, wan Man blong Leman!"

Afta hem i statem stori. "Long taem bifo, i gat wan profet we nem blong hem Samuel, i bin kam blong tijim Ol Man blong Nifae"

Taem we hem i taem blong Jonny, hem i stanap antap long wan jea. Hem i toktok long wan

laod voes. "Mi mi Samuel, mo Papa long Heven i wantem yufala blong mekem ol gudfala joes. Stop blong mekem ol nogud samting. From se long faef yia taem, bae Jisas Kraes i bon i kam long wol."

"Paa blong God i bin stap wetem Samuel," Jenna i talem.

Hem i finisim blong ridim flatem haf stori. Taem tufala i finis, Mama, Papa, mo Makenna oli klap.

"I naes tumas!" Mama i talem.

Jonny mo Jenna i bo daon.

Tufala i smael bigwan.

"Bae yumitu aktem wan moa stori," Jonny i talem.

"Bae mifala i laekem blong luk wan nara wan moa," Mama i talem. Makenna i klap mo smael.

Jenna mo Jonny i spid i gobak long Sandei bokis blong karem sam moa klos blong aktem stori.

"Sande i wan gud taem! Mi laekem blong lanem abaot ol skripja," Jenna i talem.

"Mo Jisas." Jonny i smael taem hem i faenem wan moa klos blong aktem stori. Sandei i wan spesel dei tru! ●



Yu save ridim abaot Samuel, wan Man blong Leman long Hileman 16:1-3.